

Bruttoinlandprodukt – BIP – 06.12.2018

D'Bruttoinlandprodukt, ofgekierzt BIP, oder op Franséisch de *produit intérieur brut*, ofgekierzt PIB, gëtt benotzt, fir d'Wirtschaftsstärkt vun engem Land oder enger Region ze moossen. De PIB ass näischt aneres wéi d'Zomm vun all den Endwueren, déi an engem Land innerhalb vun engem Joer produzéiert ginn. Jo, dat kléngt elo vläicht ganz komplizéiert. Mee am Fong ass et ganz einfach.

An all Land gi Wueren, wéi z.B. Autoen oder Kleeder, a Servicer, wéi z.B. Handykontrakter oder Kinosséancen, produzéiert a verkaaft. Rechent een de Wäert vun all de Servicer a Wueren zesummen, déi an engem Joer am Land produzéiert ginn, da kënnt een op de PIB vum Land. Et zielen awer nëmmen d'Endwueren. Als Beispill: Beim Brout zielt nëmmen d'Brout, an net d'Miel, dat dofir benotzt gouf. D'Miel gëtt zwar vläicht och am selwechte Land produzéiert, mee vu, dass d'Brout jo ënnert anerem aus Miel gemaach gëtt, ass et do jo scho mat dran a gëtt dowéinst net zweemol gezielt.

Sou wäit, sou gutt. Mee firwat ass de PIB dann elo gutt?

Wéi scho gesot, soll de PIB d'Wirtschaftsstärkt vun engem Land oder enger Region moossen. E gëtt doduerch och allgemeng als en Indikator fir de Wuelstand vun engem Land verstanen.

Fir verschidde Länner mateneen ze vergläichen, gëtt de PIB pro Awunner gerechent. Fir deen erauszefannen, gëtt de PIB einfach duerch d'Awunnerzuel vum Land oder vun der Region gedeelt. Lëtzebuerg huet ee vun deenen héchste PIBe pro Awunner op der Welt. Dat ass zum Deel esou, well d'Frontalieren, déi och zur Wirtschaftsstärkt vu Lëtzebuerg bäidroen, an der Rechnung vum PIB pro Awunner net berécksiichtegt ginn.

De PIB gëtt och benotzt fir d'wirtschaftlech Entwécklung vun engem Land z'analyséieren. Ass d'Wirtschaft also gewuess oder net? Ass d'Äntwert jo, dann ass de PIB vun engem Joer zum aneren gewuess an da schwätzt ee vu positivem Wirtschaftswuesstem oder och Croissance. Geet de PIB zrëck, schwätzt ee vun negativem Wirtschaftswuesstem oder vun Décroissance.

De PIB gëtt awer och ëmmer erëm kritiséiert als Method fir de Wuelstand an engem Land ze moossen. De PIB geet nämlech och an d'Luucht duerch Saachen, déi negativ Auswierkungen hunn. Zum Beispill geet duerch en Autosaccident de PIB an d'Luucht, well dann Autosersatzdeeler produzéiert musse ginn an och Autosgarage méi Aarbecht kréien. Méi Wuelstand entsteet doduerch allerdéngs net an en Accident ass u sech jo näischt Positives.

Dobäi kënnt, dass aner Aspekter, déi een och als wichteg fir de Wuelstand an engem Land kann ugesinn, net am PIB enthalen sinn. Dës sinn zum Beispill den allgemenge Bildungsgrad am Land, Ongläichheeten an der Bevëlkerung oder den Zoustand vun der Ëmwelt an der Biodiversitéit. De PIB seet also net alles doriwwer aus, wéi wäit e Land entwéckelt ass a kann als een Indikator vu ville verstane ginn.